

**Nakorsat kigutillu nakorsai kalaaliusut sooq ilinniagartik arlalitsigut nunatsinni atornagu nunattali avataani atortarneraat kvalitativiusumik misissorneqarnissaanik Naalackersuisut peqquneqassasut Inatsisartut aalajangiiffigisassaattut siunnersuut**  
(Inatsisartunut Ilaasortaq Anna Wangenheim, Demokraatit)

**Akissuteqaat**

(Meeqqanut, Inuusuttunut, Ilaqutariinnut Peqqissutsimullu Naalackersuisoq)

**Siullermeerneqarnera**

Naalackersuisut Anna Wagenheimip, Demokraatit, Inatsisartut aalajangiiffigisassaattut siunnersuutaanut qujapput.

Peqqinnissaqarfimmi sulisussaqaarniarneq pillugu annertuumik unammilligassaqartoq piviusuuvoq, pingaartumik peqqissaassut nakorsallu eqqarsaatigalugit. Peqqinnissaqarfimmi sulisussanik peqqissutsimut suliaasaqarfimmi eqqortunik piginnaanilinnik sulisussarsiorneq nalinginnaasumik ajornarnerulersimasoq arlaleriarluni oqaatigineqartarpoq. Peqqinnissaqarfipput kisimi unammilligaanngilaq ajornartorsiulli nunani allarpassuarni aamma ajornartorsiutaavoq. Tamanna ingammik ukiuni marlunni COVID-19-imik nunarsuaq tamakkerlugu nappaalanersuaqarnerani immikkut ittumik malunnarsimavoq, tamatumani peqqinnissaqarfimmi sulisut immikkut ittunik suliniuteqartariaqartarsimallutik. Nunani Avannarlerni sulisussarsiornerni unamminartut pissutigalugit sulisussat pillugit unammisupilussuuvugut.

Inuusuttut arlallit nunani allani ilinniagaqariarlutik naammassigaangamik uteqqinneq ajortut ilisimaneqarluarpoq. Tamanna nakorsanut kigutillu nakorsaanut kisimi atuutinngilaq, aammali ilinniakkani tamani. Ilinniarfinni tamani agguaqatigiissillugu 55%-it ilinniakkap naammassineraniit ukiut qulingiluat tikillugit qaangiukkaangata utertarput. Tamanna nunani uatsinnut sanilliuttakkatsinni aamma atuuppoq. Assersuutigalugu Savalimmiumi ilinniareerlutik angerlamut utertarput amerlaqatigipajaarpat.

Ukiuni kingullerni 18-ini nunatsinnut attuumassuteqarlutik nakorsannorniartut, medicin og ontologi, kandidatinningsimasut 44-pput, taakkunanga 23-t maannakkut nunatsinni najugaqanngillat. Ilinniartitaanermut, Kultureqarnermut, Timersornermut Ilageeqarnermullu Naalackersuisup ilinniartorpassuit ilinniarnernup naammassineraniit nunani allaniiginnartarnerat eqqumaffigaa. Angerlartarnissamut kajumissaariniarluni suliaasaqarfimmi suliniuteqartoqaraluartoq ajornartorsiut itinerusumik paaserusunneqarpoq, taamaalilluni suliniutinik pitsaanerusunik siunnersuuteqartoqarsinnaassammatt. Nakorsatut naammasseqqammisoq kandidatitut naammassinermi kingorna nakorsatut immikkut ittumik ilinniagaqaqqissaaq, ilinniaqqinneralu taanna ukiunik tallimanik sivilisussuseqassaaq. Kandidatinit 23-usunit qassit immikkut ittumik ilinniagaqarnersut ilisimaneqanngilaq. Nunami maani nalinginnaasumik nakorsaaserisutut immikkut ittumik taamaallaat nakorsannorniartoqarsinnaavoq, immikkullu ittumik ilinniakkat allat Danmarkimi ingerlanneqartarput, tamatumani ilinniagaq itisilerneqartarpoq aamma napparsimasutut tunngavigisat pisariaqartinneqartunik pisinnaasaqalernissamut amerlassuseqartarmata. Taamaattumik ilimanaateqarsinnaavoq inuit taakku maannakkut ilinniarnertik pissutigalugu nunani allani suli najugaqartuusut.

Taakku saniatigut nalunngilarput aamma kajuminnartunik peqartoq, taakkulu sulianut, inuttut ilaqtutanullu tunngasinnaapput ilinniarnermunik naammasserlaanut kajumissaarinernut unammilliutaasunut annertusaasut.

Taamatutaaq ullutsinni nunarsuarmioqataanerulernikuunerput nunallu tamalaat akornanni nuuttarnerup annertusinikuunera aamma eqqarsaatigissavagut. Maani aamma tamanna malugaarput nunaqqativut amerlialuttuinnartut nunanut allanut nuuttarmata ilisimasanik misilittakkanillu katersiartorlutik. Sumi sulerusunnerluta najugaqarusunnerluta nammineq aalajangersinnaatitaagatsigu tamatta tamanna eqqaamassavarput. Kiisalu nunarsuarmioqataanerulernermut nunallu tamalaat akornanni nuuttarnerup annertusineranut Nunarput sunneeqataasimaneranik tulluussimaarutigalugu.

Nakorsanik kigutilerisunillu kalaallit kigutilerisunngorniarlutik nakorsanngorniarlutillu ilinniartunit amerlanerujussuarnik pisariaqartitsisoqarpoq. Taamaattumik suliffimmik misiliinissamut periarfissanik ilinniartitaanermullu ilitsersuutunik pitsaanerusunik, ilinniartut ilinniakkat taakku naatsorsuutigisamisut innersut nalilersornissaannut annertunerusumik ilisimasaqalersitsisunik qitiutitaqarnissaq pingaaruteqarpoq.

Meeqqat atuarfianniit naammassillutik anisut 60%-ii tikillugit inuusuttut ilinniakkanik aallartitsisangillat. Taamaammat inuussuttortatta ilinniarnissaannut piareersarniarlugit annertunerujussuarmik suliniuteqassaagut. Suliaq tamanna meeqqat atuarfianniit aallartissaq.

Peqqinnissaq pillugu Ataatsimiititaliarsuarmi peqqissutsimut tunngasutigut sulisunik sulisussarsiortarnermut sulisorinniinnartarnermullu innersuussusiornissamik siunertaqartumi suleqatigiissitamik, peqqinnissaq pillugu ilinniartfinni sulisussarsiortarnermik sulisorinniinnartarnermillu sulissuteqartussanik pilersitsisoqarsimavoq. Sulisunik sulisussarsiortarneq sulisorinniinnartarnerlu ingerlaavartumik unammilligassajaamaartut ataatsimiititaliarsuami suliap qiteqqunnerani saqqummiunneqarsimavoq. Sumiiffinni ataasiakkaani peqqissutsikkut sullissisut nunatsinniiginnartartut ilinniartinneqartut naammangittut. Peqqinnissaqarfiup pisariaqartitaanut tulluarsakkanik ataqatigiissunik ukiorpasuarnilu atuutussanik inuiaqatigiilluunniit katitigaanerisa allannorgnissaata kingunerisaanik pisariaqartinneqartussat eqqarsaatigalugit ilinniartitsinissamut piginnaasanillu ineriartortitsinissamut pilersaaruteqanngittoq. Aammalu peqqinnissaqarfiup pisariaqartitaanut naleqqussakkanik ilinniartitsinermut piginnaasanillu ineriartortitsinermut aningaasaliissutit ilaannakuullutillu sivikitsuinnarmik atuuttussaasut. Suliami angusat tulliani ataatsimiinnissami saqqummiunneqarnissaat naatsorsuutigineqarput.

Taamatut oqaaseqarluta Naalackersuisut kaammattuutigaat Peqqinneq pillugu ataatsimiititaliarsuup isumaliutissiisutaa utaqeqqaarneqassasoq suliassaqarfimmi nutaanik misissuinernik aallartitsisoqannginnerani. Naalackersuisut innersuussutigineqartut ataatsimut oqallisigineqarnissaat qilanaaraat. Inatsisartut oqallilluarnissaannik kissaallugit.